

Es Fräle unn die Hutzel

Sellesmoal, es Herrle unn es Fräle hadde es Sach on die junge Läüd üwerschriewe, huann eijzed im Nawedschdübje gewohnd unn drauf gewoadd, dass de Hergodd zu sich rüffd. Sie homm nouch alsemoal in Goadde geguggd, sich mid de Enggeljien beschehdichd un de junge Läüd gesaad, wie mer doos unn selles douch gescheider heädd jönnd gemach. Unn weil es Herrle un es Fräle fürsurchliche Mönsh woann, haddese sich schue ihr Sörch besurhd. Die hoadd mer naufen Doochboude geschürhd. Dou schdonnese nijed sou im Waach römm. Es woar e gued Joahr gewasd. Öbbel, Birn un Quödsche im Üwerfluss. Die Weiwer huann die Öbbel un Birn in Scheiwe geschnejjbeld un im Baggoufe gedärred. Die jung Bäüere hoaddse dann in Bäüdel geduann un in äm von danne zwää Sörch gelejhd. Dou woannse drogge, küähl un die Mäüs kannde nijed droo. Kurz nooch Dreikönich dou wor es Fräle goornijed in de Reih. Öäschd is de Douggder komme, dann de Pforre un in de Nochd hoadd es Fräle die Aache für ömmer zugemochd. Eijdz wor öwer im Kirfich de Boude sou hoadd gefruann, onne Beerdichung wor nijed zu denge. Also hoadd mer en Sorch vom Doochboude geholld, es Fräle neigeleijhd un wieder nauf en Boude. Sou vierze Dooch für Oasder wor dann die Aarde e weng gedaad unn mer kannde e Groob gegroob. Es woann e Hauffe Läüd ouffem Kirfich un beim Dröasdele. Weil nouch Fosdezeit wor unn de Pforre midd om Dusch setz, hoadd sich die jung Bäüere nijed gewoohd wos zum Schnäübbe ouffen Dusch zu schdelle. E boor Hutzel, hoddse dou gedochd. Geijche e boor Hutzel kann kääner wos gesooch. Aach de Pforre nijed. Dou hoaddse ihrer Douchder e Schöüsselje in die Haand gedröggd un gesaad: "Mach dich emoal naufen Boude un breng von jedere Suadde Hutzel e guede Hambel voul roo. E boor Aacheblieg schbeader kömmd dos Mädje ganz aufgereijhd in die Schduwe." Mamme, Babbe ich glää mir müässe nouchemoal ouffen Kirfich. Es Fräle leijd nouch ouwe em Boude. Mir huann die Hutzel begroowe.

Autor: Rudi Dill